

Rolindo Dortalina, presidente:

Fundacion RAPAC a lanta pa rescata mucha adolescentenan di San Nicolas

ORANJESTAD (AAN) – Fundacion RAPAC ta un instancia nobo cu ta nifica “Rescata Adolescentenan pa Comunidad” cual a lanta recientemente na Aruba, den e distrito di San Nicolas. Matutino DIARIO a entrevista señor Rolindo Dortalina, ken ta fungi como presidente di e fundacion y el a menciona kico ta e meta di RAPAC.

“Nos ta un fundacion sin fines di lucro, cu legalmente a wordo institui dia 15 di Februari ultimo, y nos ta registra na Camara di Comercio di Aruba.

Nos obhetivo principal ta, brinda sosten moral, social, psicologico, spiritual, emocional na famia di hobennan cu tin problema cu comportacion y cierto vicionan”.

E fundacion a lanta den e bario Lago Heights y pa nan ta un privilegio di por yuda den e barionan den e area aki.

“Ami cu mi coleganan a constata cu tin hopi necesidad den e barionan riba problemanan di gang, antayera nochi atrobe tabata tin pelea di hobennan y nos ta bisa cu cada granito di arena por yuda, y nos a pone nos mes disponible pa yuda. Nos no a bin pa destrui ni pa competi, sino pa yuda”, señor Dortalina a subraya.

El a señala cu polis ta man na cabes cu violencia entre e hobennan, crimen, adiccion, mal comportacion, y drop outs escolar.

Señor Dortalina a acentua cu apenas nan tin un luna ta funciona y ya caba diescuater hoben a reacciona, sin cu ainda nan a cuminza sin cu nan a cuminza activamente cu nan promocion.

E ta kere cu e flyers cu nan ta sacando y cu un boca ta bisa otro ta haci cu algun hoben ta bishita e fundacion pa busca informacion, ya cu tin di nan kier cambia y ta desea di haya ayudo y ta acudi prome cu e fundacion a cuminza oficialmente.

E meta di e fundacion ta rescata e mucha y adolescente, siña nan e balor y principionan Biblico, den un ambiente di compañerismo, sirbiendo nan den nan necesidad pa hunto nan duna Dios e prome lugar.

RAPAC ta ofrece conseho na pareha, matrimonio y famia en general, nan ta yuda cu orientacion familiar y ta ofrece tayer y charlanan dinamico riba temanan di actualidad, y ademas un seccion yama “Cere” (Celebra restauracion) cu ta un grupo di ayudo mutuo cu e famianan, pa evita recaida.

“Nos ta ofrece tambe les di cuarta den e parti di musica, y e cas hogar cu ta bay cuminza funciona oficialmente a partir di

Januari 2014”, señor Dortalina a menciona.

E fundacion ta dirigi na muchanan entre nuebe pa diescuater of diescinco año di edad. Nan a opta pa frena e problemanan na un edad un tiki mas tempran, pasobra nan ta kere cu ainda tin speranza.

Hobennan di 18 año pariba ya caba nan ta hopi mal den vicio of adiccion. E funcion su email ta fundacionrapac@hotmail.com y nan telefon ta 565-23777. Nan ta invita na tur hoben y famia cu tin e necesidad di ayudo den e barionan di San Nicolas pa acerca nan.

